

IN MEMORIAM



MEHMED KRZIĆ - MEŠA, geodeta

Dana 08.06.1987.godine iznenada je umro bivši četvo-
rogodišnji predsjednik Saveza geodetskih inženjera i geome-
tara SRBiH kolega MEHMED KRZIĆ.

Drug Krzić rođen je 1909.godine u Maglaju, gdje je
završio Osnovnu školu. Srednju školu učio je u Sarajevu i
Beogradu, gdje je i diplomirao na Geodetskom odsjeku Tehnič-
ke srednje škole 1931.godine.

Po završetku škole radio je nekoliko mjeseci na prem-
jeru Djakovice, nakon čega je otišao na odsluženje vojne oba-
veze. Demobilisan je kao rezervni potporučnik. Krajem 1932.
godine radio je kao geometar u Sekciji za katastarski prem-
jer u Užicu, te na premjeru u sekcijama Kragujevac, Aleksin-
nac, Donji Milanovac i Sjenica. Početkom 1941.godine pozvan
je u vojsku. Nakon rasula stare jugoslavenske vojske dolazi
sredinom 1941.godine u Žepče, gdje radi u Katastarskoj up-
ravi.

Koncem 1941.godine aktivno se uključuje u slanje po-
moći partizanskim jedinicama u okolini Žepča, a kasnije i u
Travniku, u kojem je služio vojsku tzv. NDH. U Travniku se,
početkom jula 1942.godine, aktivno uključuje u organizovani
rad za NOB-u u okviru Vojno-obavještajnog centra pri Mjesnom
komitetu KPJ u Travniku. U februaru 1943.godine postaje kan-
didat, a u oktobru iste godine član KPJ-e. Od strane Vojnog
suda tzv. NDH je optužen i uhapšen, pa se nakon puštanja iz
zatvora, a uz saglasnost partijske organizacije, prebacuje
na oslobođenu teritoriju i uključuje se u NOV. Kada je,

16.04.45. oslobođen Maglaj imenovan je za komandanta mjesta. Po završetku rata uključuje se u rad Narodnog fronta i Sreskog narodnog odbora u Maglaju, a jedno vrijeme bio je i sekretar pomenutog Odbora. Vršio je i dužnost predsjednika Sreskog suda u Maglaju. Sredinom 1946. godine prelazi u Vareš, gdje radi na geodetskim poslovima u Rudniku željeza. Sredinom 1947. godine dolazi u Sarajevo, gdje radi najprije u Okružnom, a zatim u Gradskom narodnom odboru. Sve do penzionisanja 1967. godine radi u gradskoj urbanističkoj službi kao rukovodilac geodetske grupe.

Od 1947. godine, radeći i živeći u Sarajevu, drug Krzić bio je veoma aktivno angažovan u Socijalističkom savezu i Sindikatu. Tako je bio predsjednik Mjesne konferencije SS, predsjednik Sindikalne podružnice Gradskog odbora punih 9 godina, član Republičkog odbora Sindikata državnih službenika 4 godine, prvi predsjednik Savjeta radne zajednice opštine Centar itd.

Aktivno je djelovao u stručnim udruženjima. Nekoliko godina bio je član Predsjedništva Saveza inženjera i tehničara BiH i predsjednik Saveza geodetskih inženjera i geometara BiH u dva mandata. Zaslužni je član oba ova Saveza.

U urbanističkoj službi grada Sarajeva takodje je aktivno učestvovao u radu društveno-političkih i samoupravnih organa. Tako je bio sekretar OOSK, predsjednik Radničkog savjeta i predsjednik Upravnog odbora.

Za svoj samoprijegoran rad drug Krzić dobio je i brojna priznanja. Tako je 1955. godine odlikovan Ordenom rada III. reda, a 1963. godine Ordenom zasluga za narod sa srebrnom zvijezdom. Nosilac je Spomen plakete grada Sarajeva, zatim pisмениh priznanja Opštinske konferencije Socijalističkog saveza Opštine Centar i Opštinskog odbora Saveza rezervnih vojnih starješina.

Za svoj uspješan pregalački društveno-politički i stručni rad, kao i za svoj patriotski stav u toku NOR-a i poslijeratne izgradnje, pokojni kolega Mehmed Krzić zaslužuje naše duboko poštovanje.

Neka mu je slava i hvala!

Ismet Aganović